



- EDITORIAL • RÂL VÊNGTU
- » BAWNGKAWNAH SYNOD MUSIC SCHOOL HAWN A NI
- » TAN IN PUIPATE INKAWM
- » CAMPUS MINISTRY RAWNGBAWLNA

RNI 68092/83

From  
Synod Literature & Publication Board  
Synod Office, Aizawl - 796 001  
Mizoram. Phone: 0389-2324590

# SYNOD *Newsletter*

Volume XXXVII

No. 4

E-mail: [synodnews@gmail.com](mailto:synodnews@gmail.com)

APRIL 2022

## LÂWRKHAWM

### KOHRAN HRIATTIRNA

Kumin 2022 Nilai leh Beihruai Thupui Buah hian Kohhran ni pawimawh, a ni leh thla târ lan dik loh a awm a:

1. 'May 22, Pathianni – Pentikos Ni' tih hi **'June 5, Pathianni'** tih zâwk tûr a ni e (p. xxviii).
2. 'July 10, Pathianni – Health Sunday leh Hospital Sunday' tih hi **'July 3, Pathianni'** tih zâwk tûr a ni (p. xxxi).
3. Khawvêl Sunday School Ni hi a ni leh thla târ lan loh a ni a (p. xli). Nilai leh Beihruai Thupui Bu, p. ix-a Synod Calendar-a târ lan ang hian, **November ni 6 (Pathianni)**-a hman tûr a ni baw e.

### THAWKTU THAR


Synod Service Board chuan Synod Campus Ministry-a Counsellor (contract) tûrin Lalrinchhana s/o Lalropuia Chhangte, Bâwngkâwna mi chu a la thar a, April ni 1 aţangin a hna a zawm ang.

### DAM KIM TA

Kohhranhote ţawngţaina azârah March ni 21, 2022 khân Covid-19 lak aţangin Synod Mission Board Missionary-te an dam kim ta.

### ṬAWNGṬAI THUPUI BU

Ṭawngţai Thupui Bu chu chhut thar a ni leh ta a. Kohhran, a duh apiang tân Synod Office, Aizâwla **Mamawh Lamna**-ah lam theih a ni e.



## BAWNGKAWNAH SYNOD MUSIC SCHOOL HAWN A NI

March ni 8, 2022 (Thawhlehi) chawhnu dâr 2 khân Synod Worship Committee chuan Bâwngkâwn Kohhran Hall-ah Synod Music School a hawng. A hawna inkhâwm hi Rev. Dr K. Lallâwmzuala, Executive Secretary i/c Worship-in a kaihrui a. Rev. Dr. Vânlalngâka Râlte, Synod Moderator-in thuchah sawiin Music School hi a hawng a ni.

Upa H. Lalhmingmawia, Co-ordinator, Synod Worship Department-in report pein, Synod Music School Branch hawn thar chu kum 2019 Synod rorêl bawhzuina a nih thu leh, class ţan a nih theih hunah zîngkârah Tonic Solfa leh Staff Notation zirtîr tum a nih thu a sawi a. Class hi Bâwngkâwn Kohhran Hall-ah lâk ţhin a nih tûr thu leh, Synod Music Instructor-ten an zirtîr ţhin tûr thu a sawi baw e.

Synod Moderator, Rev. Dr Vânlalngâka Râlte chuan, "Synod rorêlnain music lama hmasâwnna tûr a rêl hi a lâwmawm a. Kristian Hla Bu leh Naupang Hla Bu en nawn hna pawh a bul ţan hnaih a ni ta hi a lâwmawm hle. Khawvêlin Mizote min hriat dân chu zai

a nih avângin, tonic leh staff notation thiam chu a pawimawh a, a ţangkai êm êm a ni," tiin a sawi a. Rev. K. Lalrinmawia, Bâwngkâwn Bial Pastor-in thu a sawi baw e.

Bâwngkâwna Synod Music School hawn tharah hian zîng dâr 6:30–7:30 chhûngin class lâk ţhin a ni dâwn a. Hripui lêng avângin zir ţan theih hun tûr sawi lâwk theih ni lo mah se, ni tin sikul hawn ruala hawn ve nghâl tum a ni. Zir duh tân tûnah hian dîl theih a ni a; March ni 30, 2022 thleng dîlna hun hawn a nih thu Synod Worship puitute chuan an sawi. Synod Music School-a tonic solfa leh staff notation Intermediate Course hi thla thum chhûng zir tûr a ni.



## CHANCHINBU LAMNA TUR THAR

**Kristian Tlangau, Kristian Naupang** leh **Synod Newsletter**, Synod Office-a lam ţhin tân a lamna tûr hmun thar siam a ni a. Synod Office chhâwng hnua ber (Basement), Synod Canteen-II kawt lamah dah a ni tawh a. Office aţanga la ţhinton he lai aţang hian lâk zêl tawh tûr a ni e.

# SYNOD Newsletter

## EDITORIAL STAFF

Rev. Lalbiaknia  
Rev. V.L. Luaia Hranleh  
Upa K. Lalnginglova  
Zohmingliana Colney

## Editorial

### NUN LAIPUIAH KRAWS

Kraws thu hi Tirhkoh Paula thuhiril laipui a ni a, a chhuan ber a ni. A nun laipui a hmang bawk. Galatia 6:14-ah, "Kei erawh chuan kan Lalpa Isua Krista kraws lo chu ka chhuan loh tûzia mai chu, chumi zârah chuan khawvêl hi ka tân khen behin a awm ta, kei pawh khawvêl tân khen behin ka awm a ni," a ti a, a ropui hle. Kraws thu hi kan nun laipui a hmang ila, kan lungawi ang a, sual kan hneh ang a, kan nunah mi dang an dam ang.

Lal Isua kraws chuan sual pawizia a târ lang a; mi sual chhandam ngai kan nih min hriattîr a. Mi sual chhandamna, mi sual thiam channa leh ngaihdamna a nih min kawhhmuh a. Pathian leh mihring inrem lehna a nih min hriattîr a. Vên kawng, chatuan nunna kawngah min hruai a. Isua Kristan kan sual leibat min tlâksak zo tih min hrilh. Inchhuang tûr, chapo tûr kan nih lohzia min hriattîr a; kan aiawhin Pa Pathian rorêlna hmaah Isua Kristan min dinsak dâwn tih min hriattîrin, hnehna min chantîr a, nun thar min pe.

Kraws kan hlat apiangin, kan tih that vete, kan thil neihte enin, keimahni lamah chhuan tûr kan dap a, mawina kan zawng a, hlimpui tûr dang kan zawng a, thil dang kan buaipui a, mahni lam kan intâr lang thîn a; kan nun erawh a ruak thung. Kraws chauh hi chhuang ve ila, buaipui ila, kraws thu hi sawiin hril ila, kan nun laipui a i hmang ang u.

## TAN IN PUIPATE INKAWM

March ni 7, 2022 khân Synod Prison Ministry Committee chu sâwm an nih angin I.G. Prisons Office-ah an lêng a, boruak tha tak hnuai a an inkawm. Synod Prison Ministry Committee hi Rev. Dr K. Lallâwmzuala, Executive Secretary i/c Prison Ministry leh Rev. Lalhmuchhuaka, Director hovin an kal a; Pi Zârzokimi, I.G. Prisons leh Pi Jennifer Chongthu, Superintendent, Prisons-ten an lo dawngsawng a ni.

He hunah hian lung in chu mi sual hremna hmun ni lovin, an lo chhuah leh hunah pawh an kua leh vêngte tâna kua leh tui tha, an lawina Kohhrana mi hman tlâk an nih theihna tûrin tisa leh thlarau lamah enkawl puitlina, chher chhuahna hmun (Correction centre) a nih zâwkzia te, a hlawhtlin theihna tûra kut themthiamna lam thil (Vocational training) tih theih leh remchâng apiang an tih theihna tûra

Training Centre dinsak a tûl thu leh hmalak dân tûr te, Kohhran leh khawtlângin lung in tângte hi en tleu mai lova, nun kawng dik leh tha an zawh hlen ve theih tawhna tûra kan mawhpurhna inzirtîr nasat leh zual tûl an tih thu te, sawrkâr leh kohhran mawhpurhna leh tih tûr nia an hriatte sawi hovin, hmalâk zêl dân tûr leh kut intihchaksak tawn dân tûr thate inpawh takin an sawi ho a ni.

## ZIRLAITE PUALIN HUN HMANG

February ni 26, 2022 (Inrinni) chawhma dâr 11 khan Synod Zirlai Viltu Committee buatsaih Synod Resource Centre member-te puala Briefing Session chu Sikulpui Hall-ah hman a ni. Briefing Session hi Zirlai Viltu Committee Chairman, Rev. Dr K. Lallâwmzuala, Executive Secretary, Mizoram Synod-in kaihruaiin Pi Zirkûngi, Secretary-in report a pe a; Pu R.L. Rinoma, IRS (Rtd)-in zirlai kal khâwmte chu briefing a neihpui.

Kum 2018 Synod Inkhâwmpuiin, "Mizo thalait Central Service-a tam zâwk an luh theih nân Synod-in hma la rawh se," a tih chu bawhzuiin, hemi kawnga hma la tûr Zirlai Viltu Committee dinin, he committee hmalakna hian September ni 20, 2021 khân Sikulpui hmunah hian Synod Resource Centre hawn a ni a. Tin, kum 2020 khân

booklet pawimawh tak tak pali, zirlait tâna thangkai tûr a lo siam tawh bawk. Tûnah hian lehkhabu volume pawh 303 lai an kawng tling tawh a ni.

Zirlai inziak lût 75 awm mêkin, group thumah then an ni a. Hemi ni hian Group C pualin briefing hun hi hman a ni a, zirlai 33 an kal a ni.

**SYNOD CHHAWMDAWLNA :** Tûn hnaia harsatna hrang hrang tâwkte hnênah Synod Relief Fund aţangin hetiang hian chhawmdawlna pêk a ni:

S.No	Khua	Pêk chhan	Chhûngkaw zât	Pêk zât (₹)
1	Thêntlâng	Damlo	1	8,000
2	Dinthar	Accident	1	10,000
3	Ramhlun Sport Complex	Damlo	2	16,000
4	Ainâwn	Ei zawna bul ţan nân	13	1,04,000
5	Bâwngkâwn	Kângmei tuar	8	72,000
6	Sairâng Dinthar	Damlo	2	16,000
7	Phuaibuang	Damlo	1	8,000
8	Dârlâk	Damlo	1	8,000
9	Ngopa Chhim Vêng	Damlo	1	5,000

**CHHIM WORKING COMMITTEE :** Chhim Working Committee Field Visit thawh hnihna chu March 15–25, 2022 chhûng khân neih niin, Administrative Secretary hovin Chhim Working Committee member 9 an kal a, Bial 11 an tlawh.

**AUDITORS' MEET LEH TRAINING :** March 25, 2022 (Zirtawpni) khân Synod Auditors'

Meet neih a ni a, Auditors' Meet hi Auditor tura ruatte tan kum tin buatsaih thîn a ni. Auditor tura ruatte hian Synod hnuai department hrang hrang an audit thîn.

March ni 26, 2022 (Inrinni) khân Bâwngkâwn Shalom Kohhranah sum wawn dân training neihpui tûrin Pu Zaihmingthanga Fanai, Upa Lalrosânga Kâwlni leh Pu R. Lalbiakdika-te an kal.



# Râl Vêngtu

Râl Vêngtu chuan khaw chhûnga mipui che vêl chu a thlîr reng a. Thênkhat hnathawk tûra chhuak, hna thawk peih lova thu khâwm mai mai te, thênkhat hnathawh tum hauh lo te, inkhâwm tum miah lo te, thênkhat chu khawlai dunga tei nilêng ringawt te, picnic-na hmuna kal zing tak te, thênkhat chu tih tûr tûl nei reng sia tih nachâng hre lo te an ni tih a hmu a.

Mipui hnênah chuan, "Covid hri lêngin rei tak a chênchilh tawh che u a, damdawi tha ei rawh u. Tichuan, hna thawk theiin in lo chak dâwn nia. Tisa leh thlarauvah chakna in mamawh a nih hi," a ti a.

Mipuite chuan, "Râl Vêngtu, damdawi tha, thlum tui tak tak leh ei nuam tak tak chu kan ei reng a, kan chak thei chuang lo a nih hi," tiin an chhâng a.

Râl Vêngtu chuan, "Damdawi dâwr aţanga in damdawi lei kha ka hmu vek a. Damdawi thlum leh ei nuam chauh in lei a, chakna damdawi lei nachâng in hre si lo va, in chak thei lo a nih hi," a ti a.

Mipuite chuan, "A nih leh chakna damdawi chu eng nge kan ei ang?" tiin an zâwt a.

Râl Vêngtu chuan, "Chhelna damdawi te, tumruhna damdawi te, thil dik duhna damdawi te, sual huatna damdawi te, tih tûr dik hriatna damdawi te va lei rawh u. Hêng damdawite hi ei a nuam lovin a tui lo naa, ei lui ula, in lo chakin, tisa leh thlarauvah in lo hrisêl tha thei dâwn nia," a ti a.

Mipuite chuan, "Râl Vêngtu, i damdawi min chawh chu ei kan lo tum ang e," tiin, damdawi lei tûr chuan an kal ta thliah thliah a.

**ZIN:** March ni 15, 2022 (Thawhlehi) khân Khawrihnîm Kohhran Biak In hmun en felin Rev. C. Zoramawia, Sr. Executive Secretary leh Pu Lalhriatrenga, JE-te an kal.

## CAMPUS MINISTRY RAWNGBAWLNA

Synod Campus Ministry chuan March 18, 2022 (Zirtâwpni) khân Kolasib Presbytery huam chhûnga Pastor/Minister/Pro Pastor leh Kohhran tin aiawh mi pakhat pualin 'Tleirâwlte Nun kaihrui kawnga inzirtîrna Symposium' Kolasib Vênglai Presbyterian Kohhran Golden Jubilee Hall-ah a buatsaih a. Resource Person atân T.Upa K. Lalêngzâma, Laipuitlâng leh T.Upa Lalthlamuana Râlte, Tuikualte hman an ni. He huna tel tûra sâwmte aţangin mi 49 an tel a, a buatsaihtute nê programme hlâwk tak an hmang ho a ni.

Synod Campus Ministry chuan March 26, 2022 (Inrinni) khân Aizâwl khawpui chhûng leh khawpui daia Bial 25 aţangin Bial aiawh mi pahnih theuh ko khâwm in 'Tleirâwlte Nun kaihrui kawnga inzirtîrna Symposium' Leitan Kohhran Hall-ah a buatsaih baw a. Resource Person atân T.Upa Lalthlamuana Râlte, Tuikual leh T.Upa K. Lalêngzâma, Laipuitlângte hman an ni. Bial tel tûra kan sâwmte aţangin mi 52-in he hun hi an hmang a, a buatsaihtute nê programme hlâwk tak an hmang ho baw a ni.



## PPPF GENERAL MEETING

March ni 4, 2022 khân Presbyterian Pastor Pension Fellowship (PPPF) chuan Annual General Meeting, Synod Office Devotion Room-ah an hmang. Meeting-ah hian member zawng zawng 124 aţangin member 80 an kal a ni.

Chawhma inkhâwm chu PPPF Chairman, Rev. Dr. Lalchuanliana'n a kaihrui a; Rev. Lairotluanga'n hunserh a hmang. Kum danga an tih thîn angin chawhma lamah member thar lawm luh bâkah report ngaihthlâk a ni a, rorêl a ni baw. PPPF Album leh Directory tlangzarh a ni baw. Meeting-ah hian member thar mi 14 lawm luh an ni a, Pastor pension thi tawh nupui paruk an tel baw.

Kum 2022-2023 chhûnga puipa tûrte hetiang hi a ni:

Chairman : Rev. Dr. Zaihmingthanga  
Vice Chairman : Rev. C. Rosiama  
Secretary : Rev. Dr. Vânlalauva  
Asst. Secretary : Rev. Dr. Lalchungnunga  
Treasurer : Rev. K. Lungmuana  
Fin. Secretary : Rev. Dr. Lalchuanliana

Chawhnu inkhâwm chu PPPF Vice Chairman, Rev. K. Lungmuana a kaihrui a; Rev. Dr. Zaihmingthanga paper buatsaih, 'Covid-19 hripui leh Kohhran' tih thupui zir ho a ni a, an sawi ho zui baw.

## SYNOD MUSIC SCHOOL ADMISSION CHUNGCHANG

A hnuaiâ târ lan ang hian Synod Music School, Mission Vêng leh Bâwngkâwnah Tonic Solfa & Staff Notation Intermediate Course zîng dâr 6:30-7:30 chhûnga zir duhte tân dîl theih a ni a. Dîl duhte chuan a hnuaiâ târ lante hi hriat ni se:

1. Worship Department, Synod Office aţangin dîlna form la chhuakin March 30, 2022 (4:00 pm) ral hma ngeiin Synod Office-ah theh luh tûr a ni.
2. Zirna in hawn a nih hunah class ţan tûr a ni ang.
3. Dîlnaah mahni awmna Kohhran lehkha thil tel tûr a ni.
4. Hriat tûr tûl dang chu dilna form-ah târ lan a ni.

Dilna form leh hriat tûr tûl dang hi Synod website, [www.mizoramynod.org](http://www.mizoramynod.org)-ah a duh tân download mai theih a ni e.

(REV. DR. K. LALLAWMZUALA)  
Executive Secretary i/c Worship



### SOCIAL FRONT SEMINAR & CAMPAIGN

March ni 11–13, 2022 chhûng khân Moral Reform Seminar leh Social Front Campaign, East Lungdâr leh Sailulâk Kohhranah buatsaih a ni a; Rev. Dr Lâwmsânga, Upa Dr. Lalrintluanga leh Rev. Lalrinmawia-te an kal.

Ni 20.3.2022 (Pathianni) khân Synod Social Front Campaign-in hetiang hian Social Front Campaigner-te an kal: Muallungthu Bialah Rev. Dr K. Lallâwmzuala (Executive Secretary), Upa H. Ngûrthansânga leh Upa J. Lalzamlia. Sateek Bialah Pu Lalremruata, Upa H. Lalsângzuala leh Upa C. Chawngthantluanga. Mêlriat Bialah Pu R. Lalnuntluanga (Coordinator), Upa C.H. Thangkhuma leh Upa S.R. Thanghmingliana.

### PES ṬANPUI

Presbyterian English School (PES) hnuai sikul, chhan hrang hrang avânga harsa zual 35 ṭanpui nan ₹71,50,000/- sem a ni a; tin, upgrade grant manual-a mi angin, sikul pakhat tân upgrade grant ₹3,00,000/- pêk a ni bawk.

### OPERATION NEHEMIA

March 4–6, 12&13, 2022 khân Operation Nehemia beihpui thlâkin, Revival Speaker-ten Aizâwl leh a dai vêlah group 12-a inṭhenin mi 2,931 hnênah rawng an bâwl.

### HRIATTIRNA

Synod Newsletter-ah hian **Chhungkaw Chanchin** huang siam a ni a, Kohhranin rawngbâwlna leh kan thiltih emaw târ lanna bik atân kan hmang ṭhin. Covid hripui lêng avânga kum hnih zet kan inkhâwm mumal tâk loh avângin Kohhranhoten chhûngkaw chanchin huangah Kohhran chanchin kan report ngai ta lo va. Hetia hri lêng a ziaawm tâk zêlah hian chhuah tûr nei chuan in Kohhran rawngbâwlna leh chêt vêlna rawn report ṭhin tûrin kan han hriattîr che u a ni.

- Editorial Board

## GOOD FRIDAY PROGRAMME (NAUPANG PUAL)

### Chawhma Inkhawm

Hruaitu chhiar tûr	:	Matthaia 27:39-44
Ṭantu chhiar tûr	:	Isaia 53:4-6
Zai ho	:	NHB No. 188 (Amah chu malsâwmna hnâr a ni)
Zaipâwl	:	Beginner Department
Recitation	:	Intermediate Department aṭangin
Thuchah (10 mins)	:	Isua nge kan thlan ve ang Barabba?
Chhiar tûr	:	Luka 23:18-19
Zai ho	:	NHB No. 41 (Isuan naupangte a hmangaih)
Bâna	:	Lalpa Ṭawngtaina

### Chawhnu inkhâwm

Hruaitu chhiar tûr	:	Marka 15:12-15
Ṭantu chhiar tûr	:	Luka 23:32-34
Zai ho	:	NHB No. 138 (Khawngaihna mak, mawi leh duhawm)
Zaipâwl	:	Primary Department
Recitation	:	Junior Department aṭangin
Thuchah (10 mins)	:	Pathian hmangaihna ropuizia
Chhiar tûr	:	Johana 3:16-17
Zai ho	:	NHB No. 106 (Aw hmangaihna a va thûk êm)
Bâna	:	Lalpa Ṭawngtaina

## CHANCHIN ṬHA THLEN NI CHAMPAPHAK

March ni 15, 2022 (Thawhlehi) kha Mizorama Chanchin Ṭha Thlen Ni champhaphâk a ni a. Hemi ni pual hian zân inkhâwm programme siam a ni a, thupui atan 'Chanchin Ṭha – Malsâwmna thlentû' tih hman a ni.

Chanchin Ṭha Thlen Ni atân hian kum 2014 hma lamah chuan Rev. J.H. Lorrain (Pu Buanga) leh Rev. F.W. Savidge (Sâp Upa)-ten Mizoram an lo luh ni, January ni 11 hman ṭhin a ni a. Kum 2012 Synod Inkhâwmpui chuan Rev. William Williams-a'n Mizoram a lo luh ni, March ni 15, 1891 chu Mizorama Chanchin Ṭha lo thlen ni atân a pawm a ni.

Rev. William Williams-a hi Khasi rama Welsh missionary a ni a. Mizote chanchin a hriatin Mizote zînga Chanchin Ṭha hriat a duh

hle a. Mizote zîngah missionary ni tûra a lo kal thei lo chungin Mizoram tlawh hrâm a tum a. Silchar DC remruatpuinain sipaiho ruala lo kalin Mizoram a rawn lût a, a hmasa ber atân Mizote zîngah Krista Chanchin Ṭha a rawn puang ta a. Synod 2012-in a rêl angin Rev. William Williams-a'n Mizoram a rawn thlen ni (March ni 15) hi Mizoram Presbyterian Kohhran chuan Mizorama Chanchin Ṭha Thlen Ni atân kum 2014 aṭang khân a hmang ta a ni.

**Worship** : March ni 8–11, 2022 chhûng khân Khawbêl Kohhranah Solfa, Zai hruai leh Conducting Training buatsaih a ni a; Pu H. Lalrinmawia, Senior Music Instructor leh Rorêlkima-ten hun an hmanpui.

**MSSU** : March ni 11–13, 2022 khân Khawhai South Bial huapin Sunday School Zirtîrtu Training, Khawhai South Kohhranah buatsaih a ni a; Pu H.K. Hmingthanzuala, Asst. Coordinator; Upa Hrilthansânga, MSSU Trainer leh Upa K. Vânlalngâka, MSSU Trainer-ten hun an hmanpui.

**Kristian Ṭhalai Pawl** : March ni 11–13, 2022 hian Central Tripura Presbyterian Youth Fellowship General Conference vawi 22-na, Tuidu Kohhranah neih a ni dâwn a, Central KṬP hruaitu - Upa Lalrinmawia Ralte,

Finance Secretary leh T.Upa H. Lalrosânga, Committee Member-te an kal.

**Kohhran Hmeichhia** : Ni 13.3.2022 (Zirtâwpni) khân Electric Vêng Bial Kohhran Hmeichhe Silver Jubilee hmanpuiin Central Kohhran Hmeichhe hruaitu – Pi Lalrinliani (Treasurer) leh Committee Member-te: Pi Zochungnungi, Pi Lalṭhakimi, Pi C. Thanpari leh Pi Laldingliani-te an kal.

Ni 11–13.3.2022 chhûngkhân Hnahlân Bial Kohhran Hmeichhe Inkhâwmpui leh Golden Jubilee hmanpui turin Central Kohhran Hmeichhe hruaitu – Pi Sailuti (Chairman) leh Committee Member-te: Pi R. Lalêngmawii, Pi Lalramzauvi leh Pi Lâwmkimi-te an kal.